

陳迦陵文集

陳迦陵儷體文集卷四

宜興陳維崧其年誤

海鹽彭孫通美門

選

吉水李振裕醒齋

選

弟

維岳緯雲

叅閱

宗石子萬

男履端

校

姪洵

啟

刻周鹿溪先生遺集啟

金沙鹿溪周先生一代楷模三吳宗匠西京黨錮盡說范滂東國人倫羣推郭泰氣節則激揚李杜理學則出入程朱士類屬以槃匝清流奉爲領袖猥以嫉劉輿之賦駟令糲酷東朝憎庾亮之塵終使鸞開北部衣冠運盡文武道

衰茲者故集沉淪傳文周散華林勲舊誰知袁粲之子孫
建業時賢孰修卞壺之墳墓未封馬鬣徒著龍門遺書乏
所忠之求弱胤抱西華之痛某等或親懿有類范雲或門
徒畧如景毅歎高山之不作猶佇風標撫流水之莫彈尚
思音搯雖賣珠合浦竟媿王成而掛劍徐君敢後季札諸
先生誼深稽呂交儼尹班伏冀共任棗梨均輸資斧按班
設局分族成編庶幾鮑宣封事不浮沉於外戚之年谷永
彈章豈泯沒於宦官之日謹啟

徵贖十三經十七史毛氏書板啟

毛氏板時在洞庭席姓質庫中茲約人出三十金贖後印書人酬以全書兩部

字易結繩權輿蒼頡書加雕板肇始開皇母昭裔初爲鈐
鏤之言沈存中備載膠泥之說石碑鐫畫基自蔡邕監本
流傳原於馮道振古鑠今匱乎尚矣慨自經從壁後書暨
熸來鹿爭劉項災逮魯魚虎鬪袁曹禍延蝌蚪牙籤玉軸
蕭梁遭侯景而還錦褉縹囊趙宋值宣和而後馬廐鈔書
之客購善本以何從兔園挾冊之夫望長編而不見綠文
匿曜兩儀亦遂以烟霾絳斗韜芒七政或因而霧塞則有
隱湖處士吳郡徵君生聖門言偃之鄉是漢世毛萇之後
沉酣六藉以鉛槧爲功勲穿穴三倉以文章爲苑囿鳩工
鍤棗旁溯叢殘設局鐫梨首先經史度之簾閣屋以巾箱

雞林遠播家珍汲古之一編驪戶遙傳人奉虞山之片紙
然而物固不常理恒難料文園旣沒詎存篋裏之凡將執
戟云亡寧保櫝中之訓纂烏棲別屋秘書亦緣是以他之
燕過誰家奇字亦於焉而皆去愍彼墨莊辱於質庫繫君
季子實小毛公班宜僚綽有父風顏延年雅傳庭誥軫懷
舊業結念先疇七日倚牆情更悲於夢冒千金飛矢望已
斷於魯連疇分鮑叔之金莫返藺卿之壁僕也願呼將伯
計出乞隣敢效一言希爲三復且夫室無諸史詎號儒林
架鮮全經何名學者較來三豕旣非裨官譴謏之流量去
一鴟復殊列肆麻沙之本欲還故物端藉高賢先祈按部
以捐貲行且酬書而減直無論噓聖賢之燼詎似千秋卽
云權子母之錢贏搯十倍時乎勿失事也可爲嗟乎銅幘

幃於程卓之家寃踰醬斲熏陟俚以金銀之氣虐甚鬱攸
何哉羽化尚想飛騰便爾塵埋猶然光怪勿使魏安釐毋
弟阻函谷以難歸須念漢董祀賢妻跋玉門而望贖爰申
罕譬庶博軒渠

徵刻吳園次宋元詩選啟

選名移
我情集

何地無愁有天長醉英雄未老藉選句以移情歲月多閒
仗鈔詩而送日維時祝融煽虐鶉火揚輝流金鑠石如逢
十日之年望雨瞻雲若在無龍之國爰約論文之侶同過
看奕之軒忽有微涼濯予煩暑縑來冰鼠爽氣襲於床頭
啖罷哀梨好風生於帳裡迫而視之是編斯在夫其語必
生新篇皆矜俊龍編鳥篆書得之壤冢之中禁嚮侯鯖味
乃在庶羞之外么絃急拍務尋歷代之遺聲迂叟漫郎詎
錄三唐之殘客問石家之廝養衣火浣者三千詢趙氏之
璵璠酬名城以十五洵他選所莫收亦諸賢所未逮者也
然欲私之篋衍旣恐令其破壁而飛念將懸以國門又難
使彼不脛而走不揣鄙人質之大雅但獲稍加畜縮便成

文苑之奇觀儻其廣致揄揚尤屬詩壇之嘉話始則計卷
以徵資後乃償書而給直勿云刈桂炊珠君乃爲此度越
恒情之論所賴鐘鳴谷應世自不乏流連古曲之人謹啟

徵萬柳堂詩文啟

都城海岱門之東沙河門之內有地一區益都相國馮公顧而樂之節縮其祿米所入買以爲園名曰萬柳堂先是元廉公希憲有堂名萬柳距都門不三十里而近當時趙承旨諸公麥作詩歌以詠之其遺址在今豐臺左右公慕廉孟子之爲人又園中種柳不啻以萬計故仍以爲名爾其迢迢紫陌表矗屢屢歷歷黃圖遙連厓隙物豐氣盛映龍樓鳳闕之光沙暖泥融分蓮勺杏園之勝扶輿蜿蜒直衛天垣碩大蕃滋原稱陸海百昌無撫地則居日月之旁萬彙芄芄上乃有雲霞之氣乃復林壑澄鮮郊垌明瑟不離闌闔澤以秀而能臞雖處京華土以敦而彌壽風喧夕碓已無三市之笙簫烟靄晨鐘竟隔九衢之車馬紅牆三

里大抵僧廬白板千家居然村舍川原寂歷頓成華子之
岡溪澗崢泓不減袁家之渴野芳襲襲境尚緬而先迎空
翠陰陰路非賒而仍誤如尋栗里舍此安之若訪桃源去
人不遠公乃體崇卑之撰積德積刑濬仁知之胸樂山樂
水經綸泉石抽黃扉補袞之餘綵揮灑烟雲藉紫閣爲霖
之鉅手若夫纔窺鶴逕便得清蒼一渡虹梁遽然空濶紅
藤百折虛堂遙峙於林端碧鮮千盤傑閣半浮於天際然
而長堤旣窈定須紺岫以縈迴曲檻將斜轉賴清湍之漱
激假使峯非峭蒨奚以顯層樓複觀之奇如其水鮮淪漣
何能覩月榭烟廊之致爰乃蹠巨靈之掌只擬成河繫彭
祖之腰惟圖觀井黎陽有土漫勞夸父以移山燕市無臺
終想女媧之煉石纔聞覆簣須臾而頽壁騰空乍見濫觴

俄頃而素波衝岸穿渠決溜翠競粘天架壑支峯蒼俱拔
地簷前瀲灩任呼白鷺之洲窗外森森直喚青猿之洞嵌
之臺榭歷亂於丹崖絳嶺之中被以房櫳參差於雁子鳬
雛之側何期輦下孕此仙都不信人間逢茲福地此固東
漢王根之宅青瑣非華抑亦南陽樊重之家綠墀掩嫫者
也然而客起而言人將有請昔者永嘉太傅墅曰東山洛
下相公園名獨樂未央官外非無蕭相之田園晝錦堂邊
不少魏公之邸第以及裴家綠野李氏平泉紅蕚紫芋預
營歸老之圖白酒黃雞早辦引年之計要皆不遠枌榆未
踰桑梓南翁北叟徜徉里社之間西陌東阡嘯詠鄉關之
內公則故園北海舊業東齊且又屢申予告之祈頻上乞
身之表而乃結廬越境築屋他鄉峯雖落雁安能挾以俱

飛石縱成羊未必鞭之便走所慮關梁迢遞難浮天畔之
槎還嗟樓閣虛無徒結海中之市情寧易喻理或難期莫
窺君子之心未測通人之意不知公也捐一切而不居棄
萬緣於何有翔於寥廓寧爲燕雀之謀視若塵埃不慕爽
鳩之樂付託則園丁牧豎無非此地之主人總管則山鳥
溪花便是吾園之家督相逢野老竟許看花但值高人何
妨載酒聯成故事敢云來者之無賢大似閒田竊恃故人
之知我於是栽之櫟栢間以楓杉永豐闌角乞來踈地之
長條灞水橋南借得銷魂之弱縷或自亞夫營裡折取數
枝或從子夏市中移來幾本或憐擁腫幾同宣武之十圍
或愛蕭疎大類泉明之五樹或將眠而乍起曾遮何妥齋
頭或似笑以如顰鳳植王恭閣後莫不延緣坂隰麗殿坡

陀倚曲水以輕狂竚迴風而旬線鶯黃乍醉已成二月之
花蛾綠方闌便作三春之雪時則蒙蒙欲下只糝絲韁漫
漫將飛偏縈繡騎游童絡繹競投光孝之坊貴客連翩儼
入康崇之巷固已都下共傳爲勝蹟奚止羣公皆奉以美
談然而揆厥由來推其所自僅侈游觀之美詎是本懷惟
矜眺覽之宜要非篤論彼金谷銅駝以後旣高臺曲館之
何存卽津陽沁水諸園并細柳新蒲而不見鴛鴦灤泠滿
湖飄墜粉之紅螭蟻墳空獨夜咽殘花之紫終成昔夢徒
記前游空存前代之亭臺未審何年之羅綺達人致嘆曠
士增歎公則午橋莊裏育嬰兼以放生奉誠園中仁民因
而愛物史譏染指何心鼎內之龜易象朶頤詎忍籃中之
蛤從此雀辭楊館定解懷恩便令燕別張巢還思報德至

於生憑廩竹亦荷矜全源出空桑咸資顧復夙依螺羸熙
熙多含哺之民小字於菟粲粲有園橋之彥公所育嬰有
爲弟子員者
此皆功德之難刊祇患榆揚之莫罄伏冀同人共賡雅唱
或詩或賦千章謝眺之吟爲序爲銘滿架徐陵之筆庶使
楊林渡口長謠君真之甘棠將期柳宿星中其指公孫之
大樹

請周翼微篆刻圖章啟

月晴紫陌只照青衫秋老渾河漸添黃葉荆軻一去市中
饒感慨之人樂毅無歸臺畔足飄搖之客爰有汝南才子
婁水名流摘文則翡翠盈箱織句則蒲桃竟幅固已江東
僑肸推以君宗河北溫邢呼爲祭酒爰觀石鼓偶客金臺
劉公幹之逸氣籍甚鄴中王輔嗣之清談斐然都下五侯
接席都爲樓護傳鯖千里知名競以陳蕃下榻昨與同人
爲言刺枝周瑜顧曲之暇間涉說文伯仁飲酒之餘兼摹
繆篆爛銅破玉頻鑱蝌蚪之形漢印秦章屢畫蛟螭之狀
然此微長原無足迷如斯小道亦又何之僕笑而言君何
不達今夫華章麗句或偏知己之難迎鉅製鴻裁恒慮賞
音之莫邁若夫見蔡中郎之鳥篆則傳觀盡訝其精覩戴

安道之雞碑則好事羣驚其妙蓋形而下者易爲知形而
上者難爲喻也然則聊爲游戲何妨暫揮郢客之斤姑與
周旋何須不刻宋人之葉嗟乎絕技可傳多能有屬祇論
一藝願諸君無失此人若問其他恐當世竟無其亞譬訪
君平卜筮亟趁其百錢罷肆之前如求王宰丹青幸需之
十日一山而後謹啟